

# Pelan pulih ekonomi jangka panjang dibentang Oktober

BH - 14/7/2020 m/s: 3

Tambah baik pasaran buruh, reformasi institusi awam antara tumpuan kerajaan

Laporan Mohd Iskandar Ibrahim, Mohd Nasaruddin Parzi, Mahani Ishak, Muhammad Yusri Muzamir dan Fahmy A Rosly bhnews@bh.com.my

**Kuala Lumpur:** Tan Sri Muhyiddin Yassin berkata, kerajaan akan membentangkan pelan pemulihan ekonomi jangka panjang pada Oktober ini yang antara lain akan memberi tumpuan kepada penambahbaikan dalam pasaran buruh, reformasi institusi awam dan kerangka urus tadbir serta pelaksanaan pendigitalan dan Revolusi Perindustrian 4.0.

Perdana Menteri berkata, Majlis Tindakan Ekonomi dalam proses penyediaan pelan itu yang merangkumi pelbagai dasar dan strategi dengan matlamat menstruktur dan mengukuhkan semula ekonomi.

“Di samping pelbagai langkah yang akan diperkenalkan dalam Bajet 2021 pada 6 November 2020, kerajaan juga sedang merangka pelbagai dasar dan strategi khusus untuk menstruktur dan mengukuhkan semula ekonomi serta menangani ketidakseimbangan pembangunan sosioekonomi Rancangan Malaysia ke-12 (RMKe-12), 2021-2025 yang akan dibentang awal 2021,” katanya.

Beliau berkata demikian menja-

wab soalan Rubiah Wang (GPS-Kota Samarahan) pada sesi soal jawab lisan di Dewan Rakyat, semalam.

Perdana Menteri juga berkata, kerajaan akan memastikan tiada rakyat yang tercicir terutama golongan B40 dalam pelaksanaan Pakej Rangsangan Ekonomi Prihatin Rakyat (PRIHATIN).

Katanya, lebih 53 agensi kerajaan di bawah Unit Pelaksanaan Dan Koordinasi Stimulus Ekonomi Antara Agensi Nasional (LAKSANA) akan memantau pelaksanaan PRIHATIN di seluruh negara.

“Kita akan pastikan semua golongan, terutama di Sabah dan Sarawak tidak akan tercicir dalam menerima bantuan kerajaan untuk meringankan beban mereka dalam menghadapi pandemik COVID-19,” katanya.

Kerajaan sudah melaksanakan pakej rangsangan PRIHATIN bernilai RM250 bilion, PRIHATIN Tambahan bernilai RM10 bilion dan Pelan Jana Semula Ekonomi Negara (PENJANA) bernilai RM35 bilion dalam usahanya untuk mengurangkan impak pandemik COVID-19.

Menjawab soalan tambahan Datuk Seri Anwar Ibrahim (PH PKR-Port Dickson), Muhyiddin

berkata, kerajaan tidak dapat membentangkan PRIHATIN, PRIHATIN Tambahan dan Pelan Jana Semula Ekonomi Negara (PENJANA) di Parlimen berikutan situasi terdesak akibat penularan COVID-19.

Perdana Menteri bagaimanapun menegaskan, pelbagai inisiatif dilaksanakan bagi memastikan nasib dan hak rakyat dilindungi. Tindakan segera harus diambil supaya bukan sahaja rakyat malah sektor lain juga terbela.

“Justeru, kerajaan tidak ada pilihan, malah saya berpendapat tindakan segera mesti diambil sebelum Parlimen mula bersidang. Kalau belum bentang, insya-Allah Menteri Kewangan akan bentang dalam sesi persidangan ini secara terperinci. Berpuluh-puluh insentif perlu dilaksanakan kerana rakyat menunggu bantuan disalurkan segera.

“Kerajaan tidak boleh tunggu sesi Parlimen sebab institusi dan perniagaan runtuh sekarang. Tugas kerajaan memastikan rakyat mesti dibela,” katanya.

Mengakui bahawa Ahli Parlimen mempunyai tanggungjawab membangkitkan soal perbelanjaan negara, beliau berkata, tugas kerajaan adalah membela rakyat



Di samping pelbagai langkah yang akan diperkenalkan dalam Bajet 2021 pada 6 November 2020, kerajaan juga sedang merangka pelbagai dasar dan strategi khusus untuk menstruktur dan mengukuhkan semula ekonomi serta menangani ketidakseimbangan pembangunan sosioekonomi.

**Muhyiddin Yassin,**  
Perdana Menteri

yang dalam kesudahan.

Kepada soalan Datuk Seri Ahmad Maslan (PN-Pontian) mengenai usaha kerajaan menangani defisit negara, Muhyiddin berkata, kerajaan maklum mengenai undang-undang dan peraturan perbelanjaan supaya tidak melebihi paras siling.

Dalam situasi terdesak akibat COVID-19 yang hampir semua ekonomi dunia runtuh, kerajaan perlu mencari sumber dalaman, bukan luaran untuk membantu

menyelesaikan masalah ekonomi negara.

Muhyiddin juga menekankan setiap kementerian dan agensi kerajaan mengurangkan kerenah birokrasi supaya proses menyelesaikan permasalahan yang timbul dapat dibuat segera.

Perdana Menteri turut menjelaskan pertumbuhan ekonomi negara bakal menguncup ketara pada suku kedua disebabkan pelaksanaan Perintah Kawalan Pergerakan (PKP). Ekonomi dijangka berkembang semula suku ketiga dan keempat.

Berdasarkan unjuran Bank Negara Malaysia (BNM), beliau berkata, ekonomi negara dijangka berkembang antara -2 hingga 0.5 peratus.

Sementara itu, Muhyiddin mengakui jumlah pengangguran akan meningkat, namun memberi jaminan kesannya terhadap rakyat dikurangkan menerusi pelaksanaan pelbagai inisiatif.

## Lima usul diluluskan di Dewan Rakyat

» Memerintahkan Ketua Polis Negara pastikan keselamatan semua laluan ke Dewan Rakyat, Bangunan Parlimen dan sekitarnya, tidak ada kacau-bilau atau huru-hara.

» Mengosongkan jawatan Tan Sri Mohamad Ariff Md Yusof sebagai Yang Dipertua Dewan Rakyat.

» Melantik Datuk Azhar Azizan sebagai Yang Dipertua Dewan Rakyat baharu.

» Melantik Datuk Seri Azalina Othman sebagai Timbalan Yang Dipertua Dewan Rakyat.

» Pelantikan enam Ahli Parlimen sebagai Ahli Jawatankuasa Pemilihan di bawah Peraturan Mesyuarat 76 tempoh Parlimen Ke-14.